

Imartani Kalaallit Nunaata aalisarnikkut oqartussaaffigisaani raajarniarneq pillugu Namminersornerullutik Oqartussat nalunaarutaata nr. 23, 29. august 2002-meersup allanngortinneqarnissaanik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut, taamaalillutik angallatit aalisariutit namminneerlutik tunisassiornissamik akuerineqarsimasut basislinjemiit miilit 3-t iluanni aalisarnissamut itigartinneqassammata.

(Inatsisartunut Atassutip ilaasortaataat)

Akissuteqaat

(Aalisarnermut, Piniarnermut Nunalerinermullu Naalakkersuisoq)

2. Aappassaanneerpeqarnera

Matumuuna Aalisarnermut, Piniarnermut Nunalerinermullu Ataatsimiititaliaq isumaliutissiissutaanut qujaffiginiarpara.

Siunnersuutip suliarineqarnerani ataatsimiititaliaq imatut allanngutissatut siunnersuuteqarpoq:

Imartani Kalaallit Nunaata aalisarnikkut oqartussaaffigisaani raajarniarnerup nalilersuiffigineqarnissaanik, tassunga ilanngullugu Kalaallit Nunaanni aalisarnermi tamarmiusumi nungusaataanngitsumik aalisarnerup pitsanngorsaaffigineqarnissaa anguniarlugu aalisarnermi atortut assigiinngitsut angallatillu angissusaasa immap naqqanut aalisakkanullu mikinerusunut sunniutaasa nalunaarsorneqarnissaanik Naalakkersuisut peqquneqarnissat pillugu Inatsisartut aalajangiiffigisassaattut siunnersuut.

Siunnersuummut matumunnga ilassutitut Naalakkersuisut sinnerlugit oqaatigissavara Kalaallit Nunaanni raajarniarneq MSC-mik meqqilersugaamat. Tunngaviit meqqilersuinissamut tunngaviliisut tassaapput:

Tunngavik 1: Aalisakkat nungukkiartuutaanngitsumik annertussuseqarnissaat Aalisagaqassutsimut nungukkiartuutaanngitsumik aalisartoqassaaq. Aalisarnissamut akuersissuteqartut tamarmik aalisassapput aalisarnerup naassaanngitsumik ingerlanneqarnissaanik aamma aalisakkatigut isumalluutinik aalisapiluffiunnginnissaanik qulakkeerinnittumik.

Tunngavik 2: Avatangiisit sunnerneqartarnerisa minnerpaaffianiitinneqarnissaat Pinngortitami ataqatigiinnerup pinngitsoorneqarsinnaanngitsup ilusia, naggorissusia, atorpeqarnera assigiinngissitaartuuneralu attatiinnarlugit aalisartoqassaaq.

Tunngavik 3: Sunniuteqarluartumik ingerlatsineq Najukkami, nunami nunanilu tamalaani inatsisit malillugit aalisartoqassaaq, ingerlatseriaasissarlu pissutsit allanngornerinut piujuartitsinissamullu sunniuteqarsinnaasoq inissinneqassaaq.

Kitaani raajarniarnerup MSC-mik meqqilersugaanerata nassataanik aalisarneq tunngavinnut taakkununga naapertuuttut isigineqarpoq, aalisarnerullu ataatsimut nalilerneqarnera tassaavoq aalisarneq nungusaataangitsumik ingerlanneqartoq.

Meqqilersuinermut atatillugu ilaatigut paasineqarpoq, marloqiusanik qalorsualinnik aalisarnerup immap naqqanik aaqqinneqarsinnaangitsumik ajoqusiisinnaanerata uppersarneqarnissaanut naammattumik ilisimasaqartoqanngitsoq. Tamanna tunngavigalugu immap naqqanik misissuinissaq pillugu Dr. Kirsty Kemp Zoological Society of Londonimeersoq suleqatigineqalerpoq. Aammattaaq imaani sunnertiasut pillugit DTU-mi Københavniittumi Inuussutissarsiutinut Ph.d.-mik pilersitsisoqarpoq. Maannamut misissuinerit taakkununga angusat MSC-ip piumasaqaataanut naapertuupput. Pilersaarutaavoq misissuinerit 2017 ilanngullugu ingerlatiinnarneqarnissaat. Soorunami inaarutaasumik angusassat aatsaat misissuinerup naammassilluinnarnerani pissarsiarineqarnissaat naatsorsuutaavoq.

Tassa allannguutissatut siunnersuummi nalilersuinissamik ujartuineq aallartinneqareerpoq. Misissuinerit taakkununga ilassutitut Naalakkersuisut soorunami inatsimmik nutarteriniarput, tassunga ilanngullugu nungusaataangitsumik aalisartoqartuarnissaa qulakkeerneqartariaqassapat imartani raajarniarneq pillugu nalunaarut nutarterneqassaaq.

Taamatut oqaaseqarlunga siunnersuut Inatsisartut akuersaartumik suliarinissaanut tunniuppara.